

Հայ գրականության օլիմպիադայի մարզային փուլի հարցաշարերի պատասխաններ 10-րդ դասարան

1. Հայ իրականության մեջ վերածնության սաղմերը նշմարվում են դեռևս IX դարասկզբին, երբ արդեն ուրվագծում էր Հայաստանի պետականության վերականգնումը: X դարում, Բագրատունիների թագավորության հաստատումով, թափ առավ քաղաքաշինությունը (Անի, Խլաթ), ծաղկեցին արհեստները, ձևավորվեց և ավարտին հասավ հայ ժողովրդական էպոսը, Նարեկացու հանճարով փայլատակեց բանաստեղծությունը, աննախադեպ զարգացում ապրեցին մանրանկարչությունը, եկեղեցաշինությունը (Ախթամար, Տաթև), Թոնդրակյան շարժումը նախագծեց մարդու իրավունքների հաստատումը, կյանք առան մարդասիրական գաղափարներ: Նարեկացին իր հանճարեղ պոեմում շոշափել է համամարդկային գաղափարներ, ջանացել է մարդուն վերադարձնել իր ազատության, ինքնություն մտածելու կարողության, բնությունը ճանաչելու և նրանով ապրելու իրավունքը: Նարեկացին գրեթե երեք դարով կանխել է Արևմուտքի վերածնունդը: Նա համարձակորեն մարդուն բնակեցրել է Աստծո մեջ և Աստծուն՝ մարդու մեջ՝ մարդուն մղելով ինքնամաքրման: Նարեկացու «Մատյան ողբերգության» պոեմը շաղախված է մարդասիրությամբ, կենսասիրությամբ, լույսով, զղջումով, այն համայն մարդկության հոգու և սրտի երգն է: «Մատյանը» մեր բանաստեղծության Աղթամարա վանքն է՝ լոկ այն զանազանությամբ, որ «Մատյանն» անկործանելի է ստուգապես»: Պարույր Սևակ

Շրջասույթները՝ մեծ աղոթասած, մեծ մարդախույզ, մեծ աստվածախույզ, մեծ տառապյալ, Աստծո խոսնակ.....

2. Հայրենը՝ որպես բանաստեղծական տեսակ, ձևավորվել է 10-12 դարերից սկսած՝ միաժամանակ թե որպես անհատական ստեղծագործություն, թե որպես ժողովրդական բանահյուսություն: Հայրեն օգտագործել է դեռևս Նարեկացին իր մի քանի տաղերում և «Մատյան»-ի մի գլխում: Հայրեններ գրել են Ֆրիկը, Ներսես Շնորհալին, Հովհաննես Երզնկացին և ուրիշներ: Հայրենների ծաղկման շրջանը 14-17-րդ դարերն են: «Հայրեն» եզրույթը վկայվել է «հայերեն», «հարեն», «հայրենի» և այլ ձևերով, որ նշանակում է, թե այդ երգերը հղացված էին հայկական ձևով և նայկական երաժշտությամբ: Հայրենը իմաստային, պատկերային, զգացմունքային մեծ խտացում ունեցող փոքրածավալ ստեղծագործություն է՝ հիմնականում չորստողանի՝ 15 վանկանի՝ 7/8 բաժանումով: Նահապետ Քուչակի (XVI դար) հայրենները ունեն խիստ անհատական դրոշմ. խոսում է իրական մարդը. տեսնում է սիրահարին և նրա սիրած գեղեցկուհուն, նրանց թաղերն ու փողոցները, որտեղ պատահաբար հանդիպում են : Քուչակի հայրենները, եթե անգամ եկել են բանահյուսությունից, կրում են խիստ անհատական բնույթ՝ սիրային, պանդխտության և խոհական բնույթի: Ներկայացված տաղում սիրահարը խոսում է իր անունից, այս դեպքում՝ կնոջ

անունից: Մերը կյանքի հիմքն է, օրհներգը, առանց սիրո կյանքն անկարելի է դառնում, աղջիկը այդ սերը օղակ է դարձնում ու հազցնում՝ սրտի ականջին, Մերդ ոսկի արիք, այսինքն՝ կրակ ու բոց, որ կնոջ սրտի քուրայում է հալեցնում: Անծանոթ տեղից եկած տղամարդու սերը կրակի նման լցվում է կնոջ ծոցիկը, սրտի ականջում հնչում է անընդհատ: Եվ չի դժգոհում «սիրո տեր» եղած աղջիկը, այլ ապրում է այդ կրակի ջերմությամբ:

Առաջին հայրենում խոսում է տղամարդը՝ հպարտ, անընկճելի, բարձր թռչող հավք է, որ ներքն չի նայում, բայց սիրո առաջ անգոր են բուռը, և գետնից կուտ չուտող ու երկնքում ճախրող թռչունի նման՝ սիրո ծովի մեջ լարված ակնատ-թակարդն է ընկնում ոչ միայն «երկու ոտքով», այլ «թեն էլ ավելի»: Ուրեմն՝ անկարելի է փակել սրտի դուռը, և ուրեմն՝ օրհնյալ են սերն ու սիրահարները, ովքեր նորոգում են կյանքը իրենց մաքուր, անշահախնդիր սիրով:

Սա է մեծ սիրերգակի հավատամքն ու պատգամը:

3. Սայաթ-Նովան միջնադարի վերջին հանճարն է, վերջին առեղծվածային երևույթը, որ այսօր էլ մնում է առեղծված՝ իր կենսագրությամբ, իր ստեղծագործությամբ, իր վախճանով: Տարիներ շարունակ վիճելի է եղել նրա ծննդյան տարեթիվը. տարբեր հետազոտողներ, ելնելով տարբեր կովաններից՝ իր իսկ «Դավթար»-ում եղած խաղերից, այդ թիվը համար են 1711, 1712, 1717 և այլն: Երկար տարիներ հավաստի է համարվել մեծ երախտավոր, առաջին սայաթնովայագետ Գևորգ Ախվերդյանի հայտնած տարեթիվը՝ 1712, այնուհետև գրականագետ Մորուս Հասրաթյանը այն համարել է 1717-ը, և միայն 1966-ին Պարույր Սևակը իր «Սայաթ-Նովա» աշխատությամբ, ելնելով Սայաթ-Նովայի խաղերից, հիմնավորապես ճշտեց մեծ հանճարի ծննդյան թվականը՝ 1722, որն էլ ընդունվեց անվերապահորեն: Սայաթ-Նովայի ծագման և կարգավիճակի մասին մեզ տեղեկություն է տալիս հենց ինքը.

Սայաթ-Նովու վաթանիցն հարց կու տան,

Մեկը կոսե Հինդն է, մեկը՝ Համադան...

Վաթանըս Թիփլիսն է, կողմը՝ Վրաստան

Մերըս Հավլաբարցի, հերըս Հավաբլու:

Այստեղից պարզ է դառնում, որ բանաստեղծի հայրը մահտեսի Կարապետն է՝ ծնված Ադանայում, որ հետո հաստատվել է Հայեպում, այնուհետև Թիփլիսում՝ ամուսնանալով սանահինցի Սառայի հետ: 1750-ին գրած խաղում Սայաթ-Նովան ներկայացնում է իր կենսագրությունը՝ 9 տարեկանից մինչև 20 տարեկանը, որից տեղեկանում ենք, որ եղել է ջուլիակի աշակերտ, հետո դարձել է «գիր- դալամին ընկեր», հետո՝ «Տասնըինը տարեկանում ման եկա Հաբաշ-Հինդուստան,

Քրսան տարուց, էշիսի ընկած, լալ կը ծախեմ սովդաքարին»:

Այստեղից ակնհայտ է դառնում, որ Սայաթ-Նովան վրաց գորագնդի կազմում մասնակցել է Նադիր շահի հնդկական արշավանքներին «ման եկա Հաբաշ-Հինդուստան», նա արժանացել է Հերակլի համակրանքին և նրա իսկ հովանավորությամբ դարձել պալատական երգիչ, ուր և հանդիպել է իր ճակատագրական սիրուն՝ արքայադուստր և արքայաքույր Աննա Բատոնաշվիլուն,

ում էլ նվիրված է նրա ողջ սիրերգությունը:Նա հրաշալի գիտակցում է, որ անհույս է իր սերը .«Գիդիմ վուր, յար, դուն ինձ լայիդ չիս անի

Դուն մի թագավուր իս, յիս՝ մե խեղճ դավրիշ.....

Ով ես , Սոայաթ- Նովա մի չարքաշ ես դուն»:

Բայց Սայաթ- Նովան արքա էր ավելի, քան այն արքաները, որոնց նա պիտի ծառայեր: Նա իր սիրած յարին «թարիփ է» անում աննկարագրելի մակդիրներով, համեմատություններով, փոխաբերություններով : «Թամամ աշխար պտուտ եկա» երգը գեղեցկուհու ամբողջական ու հմայիչ պատկեր է. բանաստեղծը շրջել է աշխարհը, անգամ Եթովպիա է հասել, բայց այդպիսի գեղեցկություն չի տեսել. իր յարի պատկերը անկրկնելի է՝ «Դուն դիփուեն բաշ, նագանի», նրա հագած անգամ հասարակ հագուստը դառնում է մետաքս՝ «Թե խամ հաքնիս, թե խաս հաքնիս կու շինիս դումաշ, նագանի»: Բազմաթիվ գովեստներով չի բավարարվում անբուժելի սիրահարը, քան որ՝ «Դո՛ւն կըրակ, հա՛ քաճըտ կըրակ, վո՛ւր մե կըրակին դիմանամ»: Բայց չդիմանալով դիմանում է, քանի որ «Աշխարումըս ախ չիմ քաշի, քանի վուր ջան ես ինձ ամա. Անմահական ջըրով լիքըն օսկե փրնջան իս ինձ ամա», նա «գարբար վըրան» է, «սուլթան ու խան» է,որի «Լիզուն շաքար, պըռոշը դանդ է, ակոեքը մարքրիտ, ալմաս է» («Աշխարումըս ախ չիմ քաշի»), «Ձենըտ քաղցր ունիս» երգում աշուղ – բանաստեղծը իր Աննային չի կարող համեմատել երկրային որևէ առարկայի հետ, որովհետև ամեն ինչ անցողիկ է՝ «Դումա՛շ ասիմ՝ շուրեղեն է, կու մաշվի,

Սա՛ լքի ասիմ՝ ախըր մին օր կու տաշվի

Ջե՛յրան՝ ասիմ շատ մարթ քիդիդ կու յաշվի,

Բաս վո՛ւնց թարիփ անիմ՝ մար՛ա իս, գո՛գալ»:

Համեմատելով «մանիշակի, ջավահիրի, լուսնի, արեգակի» հետ՝ ի վերջո գտնում է մի համեմատություն, որ միայն իրենն է՝ **«ծովեմեն դուս էկած գարա իս, գոգալ»**. մարան անգին քար է՝ առասպելական վիշապօձի գլխին, իսկ գարան ծովային ծաղիկ է: Սայաթ- Նովայի սիրո ողբերգության հիմքը սոցիալական անհավասարությունն է, և բանաստեղծը ծառանում է դրանից բխող հասարակական չարիքների դեմ: Այդ դասային անհավասարության պատճառով Հերակլ 2-րդը նրան ոչ միայն վտարում է պալատից, այլև վանականի սև սքեմ է հագցնում՝ Հադպատի վանքո ւմ կարգելով լուսարար: Անհուն ցավով կարդում ենք երգիչ- բանաստեղծի մորմոքը՝

Հադպատու լուսարար Սայաթ- Նովեն իմ

Մե կանթեղիս վառելու ձեթ չունիմ:

Այն իրականության մեծ, ուր իշխում են չաչն ու չարիքը՝ ոտնահարվում են մարդկային բարոյականության բոլոր չափանիշները, և բանաստեղծը ծառանում է աշխարհի դեմ՝ Մարթուս Էիթիբար չըմընաց, դարի ձեռնեմեն դադ կոնիմ,

Դիփ խառնակիչ ու ավիրող չարի ձեռնեմեն դադ կոնիմ:

Նա անհուն կսկիծով ու դառնությամբ իր հովանավոր արքային հիշեցնում է՝

Դուն է՛ն գրխեն իմաստուն իս, խիլքտ հիմարին բաբ մի անի,

.....

Թեվուր գիդիմ բեգարիլ իս, ուրիշին սաբաբ մի՛ անի...

Եվ ինքնաճանաչման ու ինքնագնահատման հպարտ անպարտելիությամբ հաստատում է՝ Ամեն մարթ չի կանա խըմի՝ իմ ջուրըն ուրի՛շ ջըրեն է,

Ամեն մարթ չի կանա կարթա՝ իմ գիրըն ուրի՛շ գըրեն է:

Եվ այնուհետև պահանջում է՝ Արթա՛ր դատե, չէ՞ վուր թաքավուր իս դուն

Վրաստանում տեր ու գորավուր իս դուն:

Մա 1752- ին էր. Հերակլ 2-րդը կրկին նրան բերում է պալատ, բայց «խալխի նոքարը» չէր կարող լռել, նա տեսնում էր խեղճ գլեխիների կյանքը, տեսնում էր անօրեն հարստահարիչների ամբարտավան արհամարհանքը, և մեծ Բեգարածը բազում ձևերով արտահայտում է իր դժգոհություն- ողբը՝ Աշխարըս մե փանջարա է- թաղերումեն բեգարիլ իմ, Մըտիկ տըվողըն կու խոցվի- դաղերումեն բեգարիլ իմ: 1759- ին է գրված «Աշխարըս մե փանջարա է» գլուխգործոցը: Խոցված բանաստեղծը գիտի որ՝ «դուրթը էնդուր ճամփա չէ գընում՝ շատացիլ է խալխի սուտըն»: Նա հոգնել ու վիրավորել է ամենքից ու ամեն ինչից և միայն «խալխին» է ծառայում՝ իրեն անվանելով «խալխի նոքար»՝ Արի համով դուլուդ արա, խալխի նոքար, Մայաթ- Նովա:

Մայաթ- Նովան իր 300- ամյա հեռվից իսկ մեզ պատգամում է՝ Գիր սիրե, դալամ սիրե, դավթար սիրե, որպեսզի միշտ մեզ հետ լինի Խալխի նոքարը, մեծ Ըղձավորն ու մեծ Բեգարածը, որ՝ Խաղով եկավ, ախով գնաց, Երգով եկավ, վերքով գնաց, սիրով եկավ, սրով գնաց, Սիրով մնաց, ու այդ աստվածային սերը մինչ այսօր էլ մեզ զգուշացնում է.

Հե՛ստի էշխի կըրակ ունիմ՝ ինձ մողենալ չեն կանա

Ա՛ստծու սիրուն, չմողենա՛ք՝ կու վա՛ռե, նար է բիռըս...

Իսկ մենք թչ միայն համարձակորեն մոտենում ենք, այլև ստանում ենք հանճարի օրհնանքը՝ Ով քիզի լիդի պարքիվե, դու տու շաքար....

4. Հայ նոր գրականության հիմնադիր, մեծ դեմոկրատ, լուսավորիչ, մանկավարժ Խաչատուր Աբովյանը հայ ժողովրդի լուսավոր հանճարներից է, ով իր անձը և գործը ի սպաս դրեց հայրենյաց փրկության՝ հաստատելով իր խորին համոզմունքը՝ «Չիք իմ այլ նպատակ առաջի, եթե ի հայրենիս մեռանիլ, վասն հայրենյաց մեռանիլ»: Աբովյանի ողջ ստեղծագործությունը հայոց լեզվին ու Հայաստանին ձոնված երգ է՝ գրված կրակված սրտով, անսահման սիրով, ցավով ու նվիրումով: Նա առաջինն էր, որ Արարատի գագաթից տեսավ իր «դրախտավայր հայրենիքի» անհուն ցավը, իր ժողովրդի վերքը՝ օտարի լծի տակ լինելը: Այդ օտարը, ոչ այլ ոք էր, քան խավարամիտ խանական Պարսկաստանը, որի լուծը այլևս անտանելի էր հինավուրց ու հերոսական ժողովրդի համար: Հայ նոր գրականության հիմնաքարը հանդիսացող իր «Վերքը» նա գրել է 1827-28 թվականների ռուս- պարսկական պատերազմից 15 տարի հետո: Նա ականատեսն է եղել պատերազմական իրադարձությունների, անձամբ ճանաչել է իր վեպի հերոսին, տեսել է հայժողովրդի անկեղծ նվիրումը և անխորտակ հավատը իրեն փրկություն խոստացող ուժերին: Եվրոպական կրթություն ստացած ու լուսավորության դարաշրջանի պտուղները ճաշակած գրողը, օրհնում էր «Էն սըհաթը, որ ոսի օրհնած ոտը հայոց լիս աշխարքը մտավ ուղվբաշի չար շունը մեր երկրիցը հալածեց»: Աբովյանը օրհնում էր ռուսին, որ փրկեց հայ ժողովրդին ընդամենը

Ֆիզիկական բնաջնջումից: Հայ ժողովրդի զավակը չուներ այն միամտությունը, թե Հայաստանը փրկվել է, նա քաջ գիտակցում էր, ցարական Ռուսաստանը իր շահերն ունի, որ նա ամբացնում է իր տիրապետությունը, բայց խավարից դեպի լույս տանող մի միջոց էր այդ պատմական իրադարձությունը, իսկ հայ ժողովրդի զարթոնքը նա կապում էր կրթության, գիտության ու լույսի հետ, նա պատգամում էր «Լեզուն ու հավատը խայիմ պահել», որպեսզի մյուս ազգերի նման չանհետանանք պատմության թատերաբեմից: Իր վեպի համար նա ենթավերնագիր է ընտրել «Ողբ հայրենասիրի»: Իսկ ինչու ողբ, որովհետև միլիոնավեց ազատագրվելով մեր երկիրը ընկավ մի այլ լծի տակ այն տարբերությամբ, որ փրկվեց ֆիզիկական բնաջնջումից: Իսկ այսօրվա մասին պետք է գրի աշակերտը:

Հայ գրականության օլիմպիադայի մարզային փուլի հարցաշարերի գնահատման չափանիշներ 10-րդ դասարան

- 1-ին հարցի ենթահարցեր՝ 1 - 1 մ., 2-2 մ., 3 -1 մ., 4 - 0,5, 5 - 0,5**
- 2-րդ հարցի ենթահարցեր՝ 1 - 1մ., 2 – 4 մ.**
- 3-րդ հարց՝ 5 մ.**
- 4-րդ հարցի ենթահարցեր՝ 1 – 1 մ., 2 -3 մ., 3 - 1 մ.**

Հանրապետական հանձնաժողովի նախագահ՝ Ս. Աբազյան